

Konferénts von zungmindarhaitn, Bisesti: “Haltn da kunt di zungmindarhaitn iz eppaz boda darkhennt di arbat von provintziàl Govèrno”

’Z iztase gehaltet auz pan mòrgas von 16 von hoachnach durch videokonferénts pinn vortretar von kamöüschaft ladinar, möknar un zimbar, da 36[^] konferénts von Zungmindarhaitn, augelekk von Dianst vor di zungmindarhaitn un européan audit vodar Provìntz. ’Z hâmda genump toal in trèff, vodar saal Trentino von Palàtz Dânte dar asesór vor di schualn un di universitét un kultùr, Mirko Bisesti boda hatt getrakk in gruaz von vorsitzar vodar autonome Provìntz Maurizio Fugatti.

“Haltn da kunt di zungmindarhaitn iz eppaz boda mocht karaterizarn di arbat von Governo vodar autonome Provìntz vo Tria”, hatta khött dar asesór Bisesti, bada hatt o gedenkht aftz ditza, ke tra bintsche zait barta khemmen auzgètt in di schualn an manuàl boda zoaget bia di Djunta iz nâ z’arbata “sin vodar earstn zait bobar soìn khent augelekk arbapar abezolirna di pürgar, saiz boroatante di maistre un di profesór saiz innvângante di studentn, zornirante argoméntn – vürgelekk vo se sèlbart – gepuntet dar identitét. Vonar nâsüach vo IPRASE, defatte, izta auzkhent ke di studentn hâm an groazan gait zo bizzasan mearar afte khennzaichen saiz di stòregen saiz di sèlln istituzionàln vodar ünsarn Provìntz. Dar ruòl von zungmindarhaitn saiz in ünsarne lentar, ma in da gelaichege zait a livèll internatzional un vor di eoropéan istituziongen iz a zentral punkt zo macha krescharn ünsarne djungen un ditza pintetze o pinn sèll boda khint getânt in di schualn pinn prodjèkte von Euregio: an blik aftaz sèll boz iz gest, ma hèrta schaugante vürsnen” asó hatta khött dar asesór.

’Z hatta genump toal in trèff di diridjénten von Dianst vor di zungmindarhaitn in européan audit vodar provìntz boda hatt gedenkht alle di initiativan boda bartn khemmen vürgetrakk vodar Provìntz auz pa djar, zbisnen disan auzgem in di obarschualn ’z puach abezolirna di pürgar "Minoranze e società inclusiva", gemacht pittnândar pittar Universitét vo Tria, boda untarstraicht in vèrt un bazza bölln muanen di Zungmindarhaitn in ünsarne lentar. auz pa djar 2023 barta o khemmen vürgelekk abezolirna di maistre boda lirnen in di schualn boda soìn di taütschan zungmindarhaitn, ditza dòpo azta iz khent getânt daz gelaichege vor di ladinar un darzuar nâüge trèff von “Ren pinn Zungmindarhaitn”.

In di Konferénts izta khent gezoaget biavl gèlt ’z izta aftn Font vor di Zungmindarhaitn vorz djar 2023 ke ’z iz mearar baz 738 tausankh euro. Ditza gèlt bart khemmen genützt vor bichtege prodjèkte zo schütza di zungmindarhaitn, prodjèkte boda khemmen vürgelekk von lânt vüarom, von schualn, un von kulturinstitut un garade vodar provìntz, un no von Plân vor di linguistik un kulturàl politika von Comun General de Fascia, darzuar in Plân vor di informatziongen. Di vorsâmmelung hatt âgenump bia ditza gèlt iz khent auzgetoalt.

Nâ in sèll boda auzmacht daz provintziàl gesetz, di pürgar boda gehöarn in fòlk von zungmindarhaitn hâm rècht zo haba informatziongen saiz geschribet saiz durch televisiong in di zung vo aniaglana kamòschaft. ’Z zil iz daz sèll azta di zung vodar mindarhait khemm genützt in lem vo alle tage, in famildja un auz gebantar

vèrt un machantese höarn. Ma süacht o zo pezzra bazta khint getânt über dar informatziong, redante vo hërta mearar argométn, pittnar zung hërta mearar raich asó schupftma di laüt zo nützase iantrar auz von haus o. Darzuar bartma süachan azta di zung von mindarhaitn khemm genützt hërta mearar pinn naüng tèknolodjìan un in di media, ditza zoa azta di zung khemm genützt von djungen o. 'Z gèlt untargelekk vor in Plån vor di Informatziong iz in gântzan vo mearar baz 430 tausankh euro.

Foto von Prèss Àmt

Übarsetzt von Schaltarle vor di zung von Toalkamou vodar Zimbar Hoachebene